

19. oktober 2018

UKA2018/27

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Inuit nappaammik eqqorneqarsimasut oqaaseqartartoqalersinnaanerat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Jess Svane, Siumut)

Nunatsinni utoqqalisartut amerliartortillugit nappaatit piusartut amerliartuinnartussaapput, taamaammatt qularnangilaq peqqinnissaqarfimmi atukkat pillugit oqariartuutit ilutigisaanni inuit napparsimalersartut oqariartuutaat tusaanissaat pisariaqarluinnarpoq.

Nunatsinni nappaatit pillugit suliniaqatigiiffeqarpoq arlariinni ass. Neriuffik, Uummalluttunut suliniaqatigiit, Innarluutilinnut il.il. taakkulu qutsavissaapput nukiit annertuut atorlugit suliniu-teqarmata taamaakkaluartoq misilittakkat takutippaat arlaannaannulluunniit atanngitsumik suliffeqarfiusumik ingerlatsinissaq pisariaqartoq.

Nappaateqartut tusagassiuutitigut oqariartuuteqartuarput aamma inuit nittartakkat atortagaanni saqqumilaaraluttuinnartumik ujartuinerit takussaaleqqapput. Kingullertigut PHD-liortumit saqqummiunneqarpoq nunani avannarlerni nappaassuarmi kræftimik toqquteqartartuni nunatsinni toqusartut marloriaammik amerlanerusut illuatigullu naalakkersuisoqarfimmiit akissutigineqarluni paasissutissat suliarineqarneriniit alloriartoqareersimasoq.

Napparsimaveqarfimmi sulisut amigartut ilisimaneqarpoq taamaattorli nappaateqartut atugarisaat pisinnaatitaaffiillu isigisaat atorlugit saniatigut ingerlatsisoqartariaqartoq takuneqarsinnaavoq.

Tamakku paasissutissat imminnut ataqatigiinngitsut saqqummiunneqartartillugit pisariaqarpoq atorfeqartitsinissaq nammineerluni suliassanik aaqqissuussisartussamik arlaannaannulluunniit atanngitsumik pilersitsinissaq.

Maluginiagassaavoq aningaasanut inatsimmi takuneqarsinnaammatt napparsimaveqarfimmiit taarsiissutigineqartartut qaffassimaqisut, tamanna takutitsivoq napparsimaveqarfimmiit eqqunngitsumik pineqarsimasinnaasartut ikigisassaannngitsut. Tamatuma saniatigut nappaassuaq kræfti nunatsinni nappaataavoq annertusigaluttuinnartumik ajornartorsiutaasoq, ajornartorsiutaasulli qaangerneqassappata eqqummaariffigineqarluartariaqarput nappaateqartut taakkulu atugarisaat, minnerunngitsumik timikkut allatigut nappaateqartartut malugineqarpallaaratik ilungersortut ilanngullugit eqqummaariffigineqassammata.

Nappaateqartut ataatsimut isigalugit ujartortuarpaat siunnersorneqarsinnaanissaq ilitsersorneqarsinnaanissarlu taamatullu atugarisat pitsanngorsarneqassasut, tamannalu naammassineqarsinnaalissaq atorfeqartitsinikkut soorluttaaq oqaaseqartartuusut ilisimaneqarluartut tamanna takussutissaqartikkaat.

Nappaateqartut illersuisuat imaluunniit oqaaseqartartuat tassaassaaq ukiut tamaasa suliarisartakkani pillugit nalunaarusiortartussaq, taakkulu Naalakkersuisunut, Inatsisartunut kommuuninullu nassiunneqartassapput taamaasilluni ataqatigiissumik tamatigoortumillu peqataatitsinikkut

eqqummaariffissat takuneqarsinnaalissammata. Tamatuma saniatigut sineriammi nittartakkatigut malinnaatitsineq peqataatitsinerlu ingerlanneqarsinnaassaaq taamaasilluni ullutsinnut tulluunnerusumik tamatigoornerusumillu ingerlanneqarsinnaalissalluni. Taamatuttaaq paasissutissat tassannga pissarsiarineqartussat pingaaruteqarput politikikkut pingaarnersiusariaqalernermi atorneqarsinnaasut.

Manna oqallissaarut aqputigalugu kissaatigaara oqallisigissagipput ilumut pissutit taamaaginnas-sanersoq, immaqaluunniit siunertat ataqatigiissakkamik tamatigoornerusumik ingerlanneqarpata periarfissat pitsaanerusut ujartussaneripput.